

29-bob. Soliq to'g'risidagi qonun hujjatlarini buzganlik uchun banklarning javobgarligi

228-modda. Soliq (yig'im), bo'nak to'lovi, penyalar va jarimalarni o'tkazish to'g'risidagi topshiriqnomalarni bajarish muddatlarini buzish

Bank tomonidan soliq (yig'im), bo'nak to'lovi, penya va jarima summasini o'tkazish to'g'risidagi soliq to'lovchining topshiriqnomasini, soliq organining inkasso topshiriqnomasini bajarmaslik (bajarilishini kechiktirish) —

O'zbekiston Respublikasi Markaziy banki qayta moliyalashtirish stavkasining bir yuz ellikdan bir qismi miqdorida, lekin kechiktirilgan har bir kalendar kun uchun o'tkazilmagan summa bir foizining beshdan bir qismidan ko'p bo'lmagan miqdorda jarima solishga sabab bo'ladi.

229-modda. Banklar tomonidan bank hisobvaraqlari va operasiyalar bo'yicha ma'lumotnomalarni (ko'chirmalarni) soliq organiga taqdim etmaslik

Ushbu Kodeksning **134-moddasida** nazarda tutilgan ma'lumotnomani (ko'chirmalarni) bank tomonidan soliq organiga taqdim etmaslik, shuningdek ma'lumotnomalarni (ko'chirmalarni) belgilangan muddatni buzgan holda yoki noto'g'ri ma'lumotlar bo'lgan ma'lumotnomalarni (ko'chirmalarni) taqdim etish, —

ikki million so'm miqdorida jarima solishga sabab bo'ladi.

